

之地。不若山神禱祀之區。聖門冠帶之儒。反遜廟祝緇衣之輩。於職有忝。於心何安。至於春秋祭享。供設禮儀。印學等官先事原不躬親。臨時又無檢點。牲牷則羸瘠不堪。菹醢則污濁難問。一應燔盛果品。類皆蒙垢雜陳。五鼓排班。只圖了此故套。兩行分獻。何曾竭盡寸誠。其餘朔望行香。不過勉強一到。隨班拜跪之外。並不寓目警心。凡此褻越頹風。皆於學校有玷。除九江府屬之德安縣訓導車駿。玩視學宮。現據該府詳揭請參外。合亟嚴行通飭。仰司官吏立即轉飭所屬印學等官遵照。嗣後咸宜整飭學宮。恪恭祀事。遇有傾頽添漏之處。務須隨時修補。有公項者。動支公項。其向無存留修學公項者。如爲費無幾。例應印官捐給。倘果工程浩大。力不能捐。或酌撥何項閑款。或勸諭好義紳衿。共襄盛舉。工竣造冊報核。酌請獎敘。木主位次。缺者補之。壞者葺之。顛倒者釐正之。几案勤加拂拭。庭除勤加打掃。門戶勤加關鎖。剪除瓦石之蕪穢。禁止人畜之作踐。務使廟貌森嚴。殿庭修潔。春秋祭祀。更當恪遵典禮。祇奉章程。舉凡牲牢菹醢燔黍盛果品。咸宜豐潔。勿任胥役扣剋。勿誘奴隸專司。更勿苟習便安。始勤終怠。朔望行香。亦宜留心省視。教職各官。學校是其專司。駐劄又在密邇。潔淨誠謹。不須費銀。何致多般懈怠。竟同不見不聞。守令等官。如肯隨時經理。均非紆遠繁難之事。何亦任其褻越。恬不爲怪。嗣後如有前項情弊。該省即將印學等官。分別查揭。府學怠玩。該府並難辭咎。並出示學宮門首曉諭。先將現在各該屬學宮。是否完固緣由。具文報查。凜之毋違。

嚴拿私宰耕牛檄

乾隆六年十二月

私宰耕牛。有干例禁。而偷盜耕牛。按隻加等治罪。又與偷盜別物不同。均所以重農務也。第耕牛非

輕微之物。偷牛之賊。不能私藏。不及遠竄。轉盼天明。卽被盤獲。惟勾通附近宰戶。牛隻到手。卽交宰戶。宰戶卽宰割。及至天明。蹤跡難查。故凡地方有一私宰之戶。卽添無數偷牛之案。皆此故也。今訪聞各處窩宰積棍之人。又特有交結地方坊捕衙蠹。或藉稱病牛開剝。以致公然宰賣。無人問及。是窩宰一日不除。盜牛一日不止。傷害農功。流毒無底。殊堪痛恨。如瑞州府新昌縣天寶鄉會市地方。竟有積棍劉貫劉高劉梅劉早馬劉魁五犯。窩買賊牛。或在對門私宰。或在後店開剝。或擄同猪肉出賣。平時串同衙蠹。賄買押方。把持徇庇。肆行無忌。合檄飭拿。仰司官吏卽便轉飭該府縣。立差幹役。將私宰積棍劉貫等。作速按名拘拿到案。研審窩夥串買賊牛。開圈宰賣各實情。究明是否屢犯。及牛隻確數。並坊捕保鄰人等。通同賄縱。一並分別按擬招解。仍卽通行各府屬。密加察查。

嚴禁匪船檄

乾隆六年十二月

各屬江湖港汊船隻。借名捕魚放網。掩人耳目。沿江窺探。肆行偷竊。本都院業經檄令地方文武各官。派撥員弁。分往江河及孤洲支港地面。晝夜巡查。如有飛梭等船。蹤跡詭祕。行止可疑者。卽行盤詰查拿究報等因。在案。至於飛梭兩頭忙等船。最易藏奸。久經前任各院疊次檄飭拆毀。亦在案。今據標下南昌水師營守備馮灝稟稱。豐城縣屬。屈家洲屈孫等姓。尙存兩頭忙小船。往來湖港。汛兵盤詰。輒稱編號魚船。不服稽查。未盡拆毀。偷心終在。等情。是此等匪船。各處至今仍未拆毀。遠藏私匿。恣意行竊。不問可知。仰司官吏卽便轉飭沿河之南昌饒州南康三府屬。再行逐處搜查。如有隱瞞飛梭兩頭忙等匪船。押令族房保甲報出。盡行拆毀。不許藏匿一隻。取具文武各官印結具報。向後